

Paul, Philippi Whut'enne Buts'ó K'e Yanguz-i

Paul Philippi whut'enne, hadih, 'ubulhni

1 ¹ Paul 'ink'ez Timothy 'et Sizi Gri be 'ulhnane ídli. Keyoh Philippi whut'enne Gri Sizi 'en gha Yak'usda ooch'e'ne 'uht'oh, 'ink'ez huwunline 'ink'ez yula 'ut'enne cha, nohni ts'iyawh hadih nohdítni.

² Yak'usda neBá 'ink'ez Sizi Gri neMoodihti 'en ts'un ye unzoo-i 'ink'ez be nedzi dizghel-i nohgha ínin'ai, 'i ts'iyawh nohbulh óot'e' nohba hukwa' nuszun.

Nohnaznih totsuk 'et huwa Yak'usda ts'un musi dusni

³ Nohnaznih totsuk, 'et huwa Yak'usda ts'un musi dusni.

⁴ Tenadusdli totsuk hoonúst'i' whe nohni ts'iyawh nohba tenadusdli.

⁵ 'Udechoo dzin 'ink'ez 'andit whuts'un ts'iyanne khuni unzoo-i be yasduk, 'et whe sla 'uht'en.

⁶ Njan 'et sba nawh lhe'hoot'oh, nohni nohbulh 'ut'en unzoo-i whe' yudilh'en-un Sizi Gri oodzin de, 'et de lhaídutileh.

⁷ Ts'ih'un 'uhoont'oh hukw'un'a huwun nuni nuszut. 'Inka sdzi yo 'unohusdzun. Nts'en'a dast'oh njan lhuztih t'l'ool be whédust'i, 'et hoonts'i khuni unzoo-i, 'i ba susyin 'ink'ez ts'iyanne sulh be 'alha 'uhoont'oh oohtun.

⁸ Yak'usda nalh nohdusni, nts'en'a la Sizi Gri dudzi ndulcho-i be nek'etsi'-i, 'et whuz un'a si cha tube nohk'énisli.

⁹ Nohba tenadusdli, be t'éoonudzun-i, 'i be cha 'ink'ez ye whunih-i cha ts'iyawh, 'et whuz un'a be nek'ets'intsi'-i, 'et lhat-un lhk'uz te nohba whutáleh.

¹⁰ 'Et 'uk'enus hoonzoo-un, 'et t'ewhutihzeh. 'Et huwa Gri oodzin whusahóolts'ut de, 'et de nohtsun hooloh 'ink'ez 'aw hoonli-unyaz nohk'é holts'it-un hootáloh.

¹¹ 'Ink'ez Sizi Gri 'en gha 'ut'en ts'ih'un 'unt'oh-i, 'et ndutiht'elh. 'Et whuz un'a Yak'usda ba ts'odólhti' 'ink'ez 'on nus uzdólhti'.

Gri 'en ooghu yaduk

12 Sulhutsinke sulh dahooja la, 'et whula gha ts'e 'on nus lhane dune ndi khuni unzoo-i huyoozílhts'ai sulí'. 'Et t'ewhuntahzin hukwa' nuszun.

13 'Et huwa lerwe ooyoh whucho, ndunne saldanne 'ink'ez 'onghohne cha, 'et ts'iyanne t'ehoninzun Gri 'en gha lhuztih t'l'ool be whédust'i lé'ust'oh.

14 'Ink'ez neMoodihti be lhulhutsinke unline, 'enne ndi sluztih t'l'ool 'i gha 'on nus 'ulcho-i be whélhoniljut Yak'usda ooghuni unzoo-i yahutilhduk ha.

15 'Alha' whulohne sghe hoolnih, 'ink'ez sondólhdah hukwa hut'en. 'Et hoonts'i whulohne si sts'un budzi unzoo. 'Et whuz un'a Gri 'en ghu yahalhduk.

16 N dunne sghe 'oolnihne, dich'oh 'ahuninzun hukw'un'a, Gri 'en ghu yahalhduk. 'Aw ts'ih'un un'a iloh 'uhut'en. 'Adus'ai-un 'on nus sba hoontsi' huhoolhtselh hukwa' hut'en.

17 'Et hoonts'i whulohne 'enne be nek'ets'intsi'-i, 'i be Gri 'en ghu yahalhduk. T'ehonínzun ndi khuni unzoo-i ba njan susyin, 'et hukwa 'asodilh'ai.

18 'Et nts'en'a yahalhduk 'et whunilhchoh sba 'ants'i 'uhoont'oh. Dich'oh duk'un'a tilah yahalhduk k'us khuni 'alha' 'unt'oh-i tilah 'uhutni. Gri 'en ghu yahalhduk 'et huwa hoonust'i'. 'Et nduwhulyiz 'et whuz un'a za hoonúst'i'.

Ts'ukhuna-un, 'et Gri 'unt'oh

19 T'enoohnuszun, mbene sba tenadudline, 'ink'ez Sizi Gri ooyughi 'i be sla ewhudíja, 'et 'i be 'et huwa sla nahudutitnih.

20 Ndet hukwa tse hoosdli-un, 'et daooduzni nts'oh ne'ust'en, 'et hoonts'i 'aw hukwaya oosdle' ait'oh. 'Et 'andit whuz un'a za 'utist'elh, 'et huwa 'aw hukwaya lhotisdleh. Khusna k'us dasusai 'et whuz un'a za be khusna-i, 'i be Gri 'et whe dústi'.

21 Sba njan nduhoont'oh, 'awhuz khusna za 'ust'oh de, Gri, 'en za 'unt'oh. K'us dasúsai de, 'et de whuch'a hootásdoh.

22 'Et 'awhuz khusna za 'ust'oh de, se' 'ut'en 'i mai le' tinelh. Nts'en'a 'utahaootisalh 'aw t'eeonuzúszun.

23 'Et sba nawh 'uhooja 'et 'ants'i whulhetoh nenúts'ut. Nts'e suba hoolhtus oole', 'et whuz un'a la oosneh. Ndo Gri bulh 'utist'elh hukwa' nuszun. 'Et 'uk'enus hootázoo' whe' hoont'oh.

24 'Et hoonts'i dálhusal de, 'et 'on nus nohni nohba hootázoo'.

25 'Et whuz un'a 'uk'enus soo' hoont'oh, 'et sba 'alha 'uhoont'oh.
 'Et huwa t'eoonuszun dálhusal de, 'ink'ez njan za susda de ts'iyawh
 nohbulh za tist'elh. 'Et be nohba 'alha 'uhoont'oh-i 'on nus untiyeh,
 'ink'ez 'on nus hootáht'e'. 'Et whuz un'a 'uwhutát'elh.
 26 'Et sba hoonah't'i' 'ink'ez nohghu nánusja de, 'et de si sgha lhk'uz te
 Sizi Gri dutálhti'.

Gri ba soo uznoot'i 'ink'ez 'en ba dzoh nuts'oozut

27 Nts'oh dahooja hoontsi, Gri ooghuni unzoo-i, nohba hukwa'
 ninzun hukw'un'a za yun ka dúlhtsi. Khun nohbulh 'ust'oh de, k'us
 nohch'oh 'ust'oh de, ts'iyantsuk whe nohbulh údutasts'o nohyughi
 'ink'ez nohzul bulh 'ilho za 'unt'oh. 'Et whuz un'a za Sizi ba oohyin.
 Ndi khuni unzoo-i, 'et 'i be be 'alha 'uhoont'oh-i ts'ut'ih, 'et 'i be
 'alhgoh 'ants'i 'ilho za lé'ah't'oh 'et 'i be hukwa' 'ah't'en.
 28 'Ink'ez nohch'az ditnine, 'enne bube noolhjut junih. 'Et ndaht'oh de,
 'et soo ts'et whucho whúbunulhtun, 'enne musai tilehne 'uhint'oh.
 'Et hoontsi' nohni dujihne 'ahli. Yak'usda 'en nohba' hoonla.
 29 'Et Gri 'en ba nohtl'a hóolts'ut, 'aw nohba 'alha' 'unt'oh za iloh, ooba
 dzoh nahdeh-un cha.
 30 'Et ndet whe dzoh nusuzut-un, 'et whunulh'en 'ink'ez whulh
 'udahts'o, 'et ndust'oh.

Te'uzdudil'en whe 'alhgoh 'ilho za ts'oole'

2 ¹ 'Et huwa Gri 'en nohbulh 'unt'oh nohla' tinelh ha eh? Gri ye
 nohk'e nsi'-i, 'i be eh k'e nánohni'ah? Ndoni 'alhgoh eh nohbulh
 'únt'oh? 'Ink'ez nohts'un únzoo eh? 'Ink'ez nohgha te'ninzun eh?
 2 'Et whuz un'a 'uhoont'oh, 'inka be hóonust'i'-i ts'iyawh lhadáhla.
 'Et noheni ts'iyawh 'alhgoh oot'e'. Be lhk'ehts'-i, 'i cha 'ilho za 'utit'elh.
 Nohzul bulh 'ilho sahli' le' ooht'e'. 'Et whe daja nahzun, 'et 'ilhoghi za
 tileh.
 3 Nohnich'oh hukwa' nahzun te za ne'óoh't'en junih. 'Antsi' yo
 'údudulhdzun 'ink'ez 'uyoonne nohanus hinzoo noohzin.
 4 Nohnich'oh za khun nuni noohdzut junih. 'Et k'us 'uyoonne cha
 bughu nuni nahzut bula tiht'elh ha.

Gri, Yak'usda unli, 'et hoontsi' te'dudil'en whe ndi yun k'ut inda'

⁵ 'Et ndet Gri Sizi 'en howu nuni nuzut, nohni cha 'et za howu nuni
 noohdeh.

⁶ Yak'usda dant'oh, whuz un'a za 'unt'oh.
 'Ink'ez Yak'usda yundult'oh whe 'unt'oh.

- Dich'oh Yak'usda yulh hulhgha 'unt'oh-un 'aw whe lhé'dudilti'.
 'Et huwa 'aw Yak'usda gho tiz'ai lhnízun.
- 7 'Et k'us ts'iyawh whula ditni whe be 'ulhname dahint'oh la,
 'et hóolhchoot, 'ink'ez dune dót'en sulí.
- 8 'Ink'ez dune dót'en whe hinilh'en
 'ink'ez dich'oh ts'iyanne anyo 'unt'oh na'dudulhtsi.
 Datítsah whuts'un duBá yuk'une' 'ut'en tulalhghus k'ut datítsah
 'et hoonts'i.
- 9 'Et huwa Yak'usda ts'iyantsuk whando whe yudálhti'
 'ink'ez ts'iyai oozí' ando 'unt'oh hukw'un'a yoozi' whulhtsi.
- 10 'Et huwa Sizi boozí',
 'i gha ts'iyanne dugwutsi be hits'un nudútalyalh whe' hoont'oh.
 Yak'uz whut'enne 'ink'ez ndi yun k'ut whut'enne,
 'ink'ez yun t'ah 'unt'ohne, 'enne cha ts'iyawh.
- 11 'Ink'ez lhelhyoo khuni be yalhdukne,
 'enne ts'iyawh njan duwhúdutinelh,
 Sizi Gri neMoodihti 'unt'oh.
 'Et whe Yak'usda neBá,
 'en hidílhí' whe' hutni.

Be hoot'en-i nulene

- 12 'Et huwa ook'esi'ne nts'en'a daht'oh nohbulh 'ust'en inle' whe
 Yak'usda k'une' 'aht'en. 'Andit 'aho 'aw nohbulh lhe'ust'oh 'et hoonts'i
 'on nus 'uk'une' 'ut'enne tihleh. 'Et huwa soo ts'ih'un un'a nohdusni,
 nts'en'a la dihjiz inle', 'et whénulhjut 'ink'ez nohyust'e dutlut, 'et whuz
 un'a lhadáhleh hukwa' 'uht'en.
- 13 Yak'usda 'en 'unoh'ulh'en. Ndai yuka' ninzun 'ink'ez nts'en'a hukwa'
 ninzun, 'oh te né'nohulh'en.
- 14 Ts'iyantsuk whe lhdulhyoh 'udoohni' junih. 'Ink'ez khun te lhch'a
 holh'e' junih.
- 15 Nohk'e hóotalts'ulh-un, 'et whuyit 'uht'oh 'ink'ez ootsun hoolohne
 oohle', 'et whuz un'a Yak'usda buzkeh tihleh 'et whe 'aw nohk'e'
 holts'it ait'oh. Ndunne tank'us 'únt'ohne 'ink'ez lubeshi 'uk'enus ntsi'-i
 ooleh hukwa' 'ut'enne, 'enne butoh 'ulhdzis be hoot'en-i k'un'a ooh't'e'.
- 16 Ndi khuni be ts'ukhuna-i, 'i za soo cho ooh'tun. 'Et whuz un'a Gri
 oodzin de, dalcho-i be hootást'e'. 'Oh de de, whusúntilhtun niz de
 ndet la hukwa 'ist'en-un 'ink'ez ndai 'is'en-i, 'i ts'iyawh 'aw 'ants'et
 lhe'úst'el.
- 17 'Et hoonts'i be nohba 'alha 'uhoont'oh-i, 'ink'ez Yak'usda ba
 'aht'en-un, 'ohwhi 'ants'i Yak'usda gha t'aih-i le' 'unt'oh. 'I k'ut be

klusna-i 'ants'i nadísjul le 'ust'oh, 'et huwa hoonúst'i, 'ink'ez ts'iyawh nohbulh whúnusni.

18 'Et huwun za nohni cha hoonáht'i' 'ink'ez sulh whunulhni.

Paul Timothy ghu yalhduk

19 'Et Sizi neMoodihti 'en oot'a ninustan whe Timothy 'aho nohts'un tis'alh. 'Et whusanája de, daht'oh la sudáni' de, 'et la hóst'e'.

20 'Aw dune yundult'ohne hooloh. 'En la soo cho nohghole'.

21 'Uyoonne ts'iyawh didutch'oh dude 'ut'en k'oh za hukwa hunuta, 'aw Sizi Gri be 'ut'en k'oh iloh.

22 'Et hoonts'i Timothy nts'en'a dune unli, nohni ts'iyawh t'eeonúhzun. Dune ooye' nts'en'a dubá yula 'ut'en, 'et whuz un'a za 'ulhna k'un'a ndi khuni unzoo-i, 'i be lhla 'ít'en.

23 'Et huwa 'et njan nts'en'a sulh daootanelh-un, 'et nawhus'ai de, 'aho la nohts'ún tóos'a'.

24 'Et hoonts'i neMoodihti 'en oot'a nínustan si cha 'aho nohts'un tisyalh nuszun.

Paul Epaphroditus yudálhti'

25 'Et howu nuni nuszut, Epaphroditus 'en nohts'un tóos'a' huba' hoont'oh. 'En neulhutsin 'unt'oh. Sulh 'ut'en-un cha 'unt'oh 'ink'ez 'ilhoh salda ídli. 'Et nohni nohba khuni na'á-un cha unli. 'En 'unt'oh ndet hukwa' nuszun-un, 'et whunilhchoh whe sla 'ut'en.

26 'Oh da' ndun bulh 'údahts'o nduda inle'. 'Et huwun oodzi únduda 'ink'ez nohni nohk'éninli.

27 'Ink'ez 'alha' tube ndida'. 'Ankw'us dazsai, 'et hoonts'i Yak'usda yugha té'ninzin. 'Aw 'en za iloh, si cha sgha té'ninzun. 'Et huwa 'on 'un lhan'un te ts'odi lhúsdloh.

28 'Et huwa 'aoodunih be nohts'un whes'a'. Ah'en de, 'et de la hóht'e'. 'Ink'ez la 'aw tube sdzi lhundoosdoh.

29 'Inka neMoodihti 'en gha hoonáht'i' whe yoh danúlhtih. 'Et ndunt'ohne, ubudúlhti'.

30 'Et Gri 'en be 'ut'en k'oh huwa, 'ut'en ooba lhai k'et, 'ankw'us dazsai. Dich'oh ye khuna-i, 'i hoonts'i ooba 'ants'i yint'oh. 'Et huwa ndet whe sla tihnelh inle', ndai la be sla lhe'áhnél-i, 'i ts'iyawh dich'oh ye sla 'uja.

Gri 'en za ba ts'oot'en

3 ¹ Sulhutsinke 'udek'ez-un nohdusni. NeMoodihti 'en bulh ts'ónilhni! Nohts'ó k'ergus-i, 'i za 'unt'oh. 'Et hoonts'i sba 'ants'i hoonli, 'ink'ez bé dóohjih sih.

2 Mbene lhike ndult'ohne buch'a huwahli. 'Ink'ez 'ut'en ntsi'-i 'ulh'enne cha buch'a huwahli. 'Ink'ez yané'dudut'asne cha buch'a huwahli.

3 'Et wheni ts'ih'un un'a ts'ot'az 'et huwa. 'Ink'ez Ndoni 'en be Yak'usda ts'un teni' uznilhczun. 'Ink'ez Gri Sizi ooba ts'odilhzi'. 'Ink'ez neyust'e k'oh ts'e 'et 'aw whut'anílhzi'sunítan.

4 'Et hoontsi' si cha hukwa' nuszun de, syust'e k'oh ts'e, 'et za whut'aninustan 'et hoontsi' hukwa lhe'núszun. 'Et 'uyoonne duyust'e k'oh ts'e 'uhint'oh, 'et si 'on nus whuz un'a 'ust'oh.

5 Whuzusdli whuts'un lhc'u dit dzin 'et ooka dune tsinli k'ut nehoot'as, 'et ndusíhinla. Israel oots'u hainzut-un usdli. Benjamin bulh didowhne, 'ilhoghun 'ust'oh, 'ink'ez Hebrew bughuni k'oh ts'e yasduk-un 'ust'oh. 'Ink'ez pharaseene, dahoont'oh whe Moses be 'udustl'us k'une' hut'en, 'et si cha bubulh didowh-un 'ust'oh.

6 Tube hoolhtus whe 'ust'en. 'Ink'ez Yak'usda ba 'ilhunaoodulhne, 'enne dzoh nubusdeh inle!. 'Ink'ez dune Moses be 'udustl'us be ts'ih'un 'unt'oh-un tileh de 'et huwa 'aw whe sk'e hóotalts'ulh-un hootáloh whe 'ust'oh.

7 'Et hoontsi' ndóohoolcho whe sba hoonzoo sutilhtselh inle!, 'et Gri 'en ba 'ants'et 'íst'en whuzdli! 'et nawhus'ai.

8 'Aw 'et za iloh 'uwhudusni, Gri Sizi 'en sMoodihti dant'oh la t'ezninzun-un, 'et hooncha k'et 'aw 'uzdooni' ait'oh. Dáhoont'oh ooghu t'eeonúszun-un sghu hóolhchoot-un, 'et whunilhchoh whula disni. 'I ts'iyawh 'un tukat-i sba unli 'et huwa 'on nus Gri t'enooszeh ha.

9 'Ink'ez 'en ooyudúsdá. Moses be 'udustl'us, 'aw 'i gha ts'ih'un dune lhúsdloh inle!. 'Et k'us Gri sba 'alha' 'unt'oh 'et huwa ts'ih'un dune susdli!. Be ts'ih'un un'a be dune tsinli-i, be 'alha 'uhoont'oh-i, 'i be Yak'usda ts'un ha whúlt'suk.

10 'Et Sizi Gri 'en t'entiszeh hukwa' nuszun. Ye ulhtus-i, 'i be dunaidilhti, 'ink'ez dahoont'oh whe dzoh nusuzut, 'et cha t'ewhuntsizeh. 'Et dazsai, si cha whuz un'a za 'utisnelh.

11 'Et 'alha 'uhoont'oh, si cha yaidlane toh ye dunadija-i, si cha uncha ndúsja.

Ndo whuz za hukwa' ts'oot'en

12 'Awhuz 'aw whunilhchoh huba soo lhe'ust'oh. 'Ink'ez soo 'et lhádúlya-un susdli!. 'Et hoontsi' nust'i za 'ust'oh. Di ha Gri Sizi 'en silhchoot, 'et whuz un'a si cha itáschulh.

13 Sulhutsinke sich'oh 'awhuz whuschoot lhnúszun, 'et hoontsi' 'ilhoghun huba za 'et ndust'en. Ndet la senghu hooskat-un, 'et 'aw

howu núní lhnuzuszut whe whunaoodíznoh. 'Ink'ez stso ts'e hoonli-i, 'i za óschoot hukwa' 'ust'en.

14 Yak'usda Gri Sizi ndo negha whúta'alh-un, 'et whuts'un za hukwa' 'ust'en.

15 'Et huwa lhadulyane, 'enne cha whuz un'a za nuni hunoodeh, 'ink'ez nohni 'uts'un un'a 'unahzun de, 'et hoonts'i ts'iyawh Yak'usda t'enhwhuntihdzeh.

16 'Et hoonts'i ndet la 'uda' neghá whults'ut-un, whuz un'a za nunts'óodilh 'ink'ez lhk'un'a za nuni uznoodeh.

'Awet yun k'ut uzdilhts'i 'et hoonts'i yak'uz nekeyoh whe' hoont'oh

17 Sulhutsinke sk'un'a 'aht'en. 'Ink'ez 'uyoonne si sk'un'a neMoodihti ba yinka dilhts'ine, 'enne cha bunulh'en. Wheni nek'oh ts'e ooh't'e' ha 'uts'int'oh.

18 'Et lhane 'aw whuz un'a yinka hudílt's'ih. Lhat nohdásni!. Doo cha za snatsul too' hoonli whe nohdúсни, 'enne Gri ootulalhgus ch'az ditnine 'uhint'oh.

19 Ooba 'alha' lhe'hoot'ohne ninta' hutit'elh. Bubut 'i buba Yak'usda unli. Ndi yun k'ut yooya ts'iyawh hiyulh 'unt'oh 'ink'ez 'i za hiba whudílti!. Ndi yun k'ut hoonli-i, 'i za ghu nuni hunudeh.

20 Wheni 'et yak'uz nekeyoh whe' hoont'oh 'et huwa. 'Et whuts'un neulhyis-un nets'u tiyalh, 'et huba néznisdil. Sizi Gri neMoodihti, 'en 'unt'oh.

21 'Ink'ez neyust'e tel'en-i, 'i duyust'e diziti-i k'un'a 'unt'oh yutilhtselh. Ye ulhtus-i, 'i be ts'iyantsuk ook'une' whut'en, 'i be 'uyoo yust'e neba itilhtselh.

4 ¹ 'Et huwa sulhutsinke ook'esi'ne nohk'énisli cha 'ust'oh. Nohni nohgha hoonúst'i!, 'ink'ez nohni sba be whuch'a whundeh-i 'ahli. Ook'esi'ne, neMoodihti 'en ba soo cho núdulhya.

² Nohni ts'ekoo Euodia 'ink'ez Syntyche, nohghu tedusdli, neMoodihti 'en be lhk'un'a za nuni nuhzut.

'Ilhoh za 'uts'oot'e', 'alhgoh ts'uhót'e', 'ink'ez tenazdoodli

³ 'Ink'ez nyun ts'ih'un sts'ú ditni-un inli, nts'u tedusdli, ndunne ts'ekoo, khuni unzoo-i be sla 'it'enne, 'enne bula 'int'en. Clement, 'en cha, 'ink'ez 'onghohne cha sla 'it'enne, 'enne ts'iyawh ndi 'udust'lus khunane buboozi' ook'usguz-i, 'i k'ut 'enne cha buboozi' 'uk'usguz.

⁴ NeMoodihti 'ahoolhyiz 'en be whunúlhni! Doo cha za 'udusni, whunúlhni!

⁵ Ts'iyanne dune soo ne'bulh'en. NeMoodihti whusanátidalh-un 'awet whenghoh 'úhoont'oh.

6 Hoonli huwu ni oohle' junih! 'Et k'us ts'iyaitsuk ooba tenadahdli. 'Ink'ez tedahdlih, 'ink'ez musi dóhni'. Be ndunihzut-i, 'i ts'iyawh Yak'usda ts'un ooka' dahni.

7 'Ink'ez Yak'usda be nedzi dizghel-i, hooncha k'et 'aw t'eznoozeh ait'oh. 'Et Gri Sizi 'en be nedzi dizghel-i, 'i nohdzi yo 'ink'ez noheni cha 'et ts'iyawh yughu tileh.

Ts'iyawh nohba whudizti'-un, 'et howu nuni nuhzut

8 Sulhutsinke 'udek'ez nohdusni. Ndai la 'alha' 'unt'oh-i, ndai la k'us hóoncha-un, ndet la ts'ih'un 'uhoont'oh-un cha, di la ootsun hooloh-i, di la 'uzoo'-i, ndet la 'et nduhoont'oh-un hoonzoo whe howu yats'ulhduk, ndi ts'iyawh nohba whudizti'-un, 'oh za howu nuni nahdeh.

9 Ndet si sgha whe hodilh'e'-un, 'ink'ez ndai sghuni ulhchoot-i, 'ink'ez whudáhts'o-un, 'ink'ez nohnalh 'ist'en-un, 'et cha, whuz un'a ne'ooht'en. 'Ink'ez Yak'usda be whúdzizghel-un, 'en si nohbulh óot'e'.

Philippi whut'enne bula hooni

10 'Et sa' inle' whe doo cha za sghu nuni nahzut 'ink'ez 'ahoolhyiz snalhnih 'et hoonts'i whe sla' tiht'elh 'aw nohgha lhuwhulhtsit. 'Et huwa neMoodihti 'en be hoonúst'i'.

11 'Aw be ndunusdzit-i, 'i ooghu yalhuzusduk. Nts'en'a la dast'oh, 'et hoonts'i hoonúst'i'. 'Et whuz un'a hodiz'e'.

12 T'eeonuszun hoonliyaz 'endunidzit, 'ink'ez lhái 'ust'i-un, 'et cha t'eeonuszun. 'Et huwa nts'oh dahoont'oh hoonts'i sye'últ'silh-un, 'ink'ez unusdai-un cha, 'ink'ez 'uzdlai-un cha, 'ink'ez 'endunisdzit-un, ts'iyawh t'eeonuszun.

13 Gri 'en 'uja be stus-i sgha nín'ai. 'En be ts'iyantsuk 'uwhus'en.

14 'Et hoonts'i dzoh nusúszut-un huwa, 'et hoonzoo whe 'ahja sla 'iht'en.

15 Philippi whut'enne, nohni za sla 'áhja. 'Udechoo khuni unzoo-i be yawhenusduk whe, 'ink'ez hukw'elh'az yun k'ut Macedonia howu natisja whe, ndunne Yak'usda ba 'ilhunaoodulhne ts'iyawh, 'aw 'ilhoghun hoonts'i hoonliyaz sgha lhi'al. Nohni za 'et ndúsahla.

16 Keyoh Thessalonica 'et susda whe, ndai lhúst'i inle', nat lhk'elh'az stso t'l'a'ih'ai.

17 'Aw hoonliyaz sgha' tih'alh-un, 'et hukw'úlhuzust'oh. Nus de nohba 'uk'elha tileh-i, 'i za nohba ooka' nuszun.

18 'Alha' ts'iyai lhái 'ust'i. Epaphroditus 'en be ndi stso t'l'ahla-i, 'i ts'iyawh úschoot, 'ink'ez 'unísdai. Sooltsun-i, 'i ndulcho whe

oonawhultsun le' 'únt'oh. 'I huwa t'aih-i 'unt'oh. 'Et huwa Yak'usda tube cho hoont'i'.

¹⁹ 'Ink'ez Gri Sizi ye dizti'-i, 'i gha sYak'usda be ndunihdzit-i, ts'iyawh nohgha ítalelh.

²⁰ 'Et neYak'usda 'ink'ez neBá, 'en ts'un 'ilhiz wheni tube cho uzdílhiti'. 'Et ndo honeh.

Ts'iyanne Yak'usda ooch'e'ne, ts'iyawh hadih budohni

²¹ Mbene la Gri Sizi 'en be Yak'usda ooch'e'ne, ts'iyawh hadih sba budohni. 'Et sulhutsinke szih dilhts'ine, 'enne cha hadih nohuhútni.

²² 'Ink'ez Yak'usda ooch'e'ne njan dilhts'ine, 'enne ts'iyawh hadih nohuwhutni. Mbene Ceasar ooyoh dilhts'ine, 'enne soo hadih hutni.

²³ NeMoodihti Sizi Gri ye unzoo-i, nohni ts'iyawh nohbulh oot'e'. 'Et ndo honeh.